

欽定剿平三省邪匪方略

正編

白
二
九

卷之十

七

三

欽定剿平三省邪匪方略正編卷二百八十二年辛酉

十一月初一日

甲戌

額勒登保奏言查李彬股匪

經臣一路官兵截回後連夜向東南逃竄由蒼

溪之大石坎龍山一帶竄向巴州之恩陽河亡

命疾走臣

派令遊擊劉健標王兆龍等酌帶鄉

勇五百名躡蹤前進杜其折竄之路臣

與楊遇

春及馬步兵勇敢道饒子壩桑樹壩一帶顧定

西北由捷徑抄擊十五日趕抵恩陽河接見總
兵田朝貴據稱勒保派令探剿李彬股匪連日
由巴州一帶取道前來昨至恩陽山正遇賊匪
由黃栢河竄出田朝貴率兵迎擊斬獲數十人
賊衆竄上獅子頭山梁田朝貴帶兵搶上不料
該匪分爲兩起竄伏趁我兵前起追上山梁時
後起之賊由溝中突出擾亂鍋帳後隊我軍將

弁兵勇竭力抵敵攪殺一處田朝貴一面分兵
在山上抵禦一面帶兵轉回奮力殺賊十數名
將賊擊退該匪向山後趕上前股之賊同向

青龍坎一路竄去

臣

深爲焦憤查探該匪距我

兵已有二百餘里卽率同楊遇春等由江口板
廟場緊顧北面每日趁月色起營兼程追剿十
八日晚間抵雷公坑探知賊匪在達州屬之劉

家壩屯紮相距五十餘里臣遂飭官兵等於山

後潛地紮營畧爲食息卽於二更時發兵令楊

遇春帶同副將蕭福祿叅將劉維馨吳廷剛等

率領兵勇由右面之白山寨周家岩小路抄至

劉家壩後山臣督率副都統銜全德侍衛捫欽

保副將張瑗叅將唐文淑特依順保遊擊祝廷

彪等帶領馬步兵勇由左面沿河岸前進五更

時趕抵劉家壩賊匪正在起竄兩路兵勇一齊

衝殺立斃賊匪二百餘人賊勢大潰分路奔逃

一股千餘人由北面遁去楊遇春率同張瑗特

依順保等帶領馬步兵勇跟蹤追殺一股千餘

人向東面逃竄

臣

督率蕭福祿劉維馨吳廷剛

等奮力追趕該匪翻越熊家灣山梁我軍前隊
由旁路橫衝而上將該匪截爲兩股蕭福祿吳

廷剛等帶領兵勇追殺前股其後股數百人驚

慌回竄正值

臣

帶領後隊官兵趕到遂督飭侍

衛歡格佐領綽卜通阿甲兵德昌等鎗箭齊施

併力衝殺殲斃數十人前隊叅將吳廷剛都司

劉元明外委翟廷書分帶兵勇折回夾攻殺賊

二百餘名生擒八九十名內有賊目魏中均苟

朝萬先鋒王士元趙世佐朱珍及李彬之師王

廷棟等六名臣因追殺緊急飭將魏中均等六

人捆押其餘當俱砍斃尙有賊匪一百數十人

翻山奔逃臣飭令蕭福祿等分帶兵勇覓路抄

殺臣復帶兵緊追至一山峽中擒斬百餘人有

賊目王朝富帶領十三人棄械跪地投誠臣派

兵管押仍督師追剿前面奔逃之賊該匪已由

關爺廟馬渡關向東逃遁湯遇春等官兵由淺

壩場尖山寨追剿前進沿途亦斬獲一百餘人
賊匪竄至大寨門山梁恃險抗拒張瑗等帶兵
奮力上攻張瑗手射數賊賊匪持矛攢刺戳透
綿衣張瑗拔刀將賊矛格斷楊遇春督兵鼓勇
競進搶上山梁賊匪潰敗復追趕三四十里殺
賊二百餘人生擒一百二十餘名內有僞總兵
唐世禮鮮士得朱九青鄧天培何順等五名楊

遇春於日暮時仍收兵與臣會合統計殺賊六

百餘名生擒及各處搜拿賊匪五百四十二名

滾崖跌斃及逃散者甚多獲騾馬三百餘頭匹

刀矛旗幟七百餘件並有道員劉清所帶新勇

李元受孔傳世等臨陣喊叫投出苟能新龐思

聰蒲新堂等十人一併帶送到營臣將各匪逐

一查訊據魏中均唐世禮等十一名供稱俱係

通巴一帶民人與冉文儔一同起事自冉文儔
冉添元死後推冉添泗王士虎李彬爲元帥王
恒爲老掌櫃我等多是頭目充當總兵先鋒王
士虎冉添泗向與李彬分爲兩股自王冉二人
被官兵擒獲後餘匪七八百人與李彬合夥共
有二千數百人前蒙招撫亦有逃出之人我們
自知情罪重大未敢出投且因李彬防範嚴緊

不能脫身想要逃往陝西經官兵截回大衆商
議祇可往東鄉太平一帶山林內躲避不料官
兵追趕今日皆被擒拿李彬不知從何處逃走

等語

臣

卽飭將魏中均唐思禮等十一名凌遲

處死其餘燕成美任中魁等三百七十八名均
係積年矛手並有他股內剿散附入李彬王冉
股內之人概行正法其王從治等男婦一百五

十三名口訊明實係被脅未久均交道員劉清
分別安置所有棄械投出之王朝富苟能新等
二十三人卽欽遵

諭旨釋放亦交劉清妥爲安插此次我軍與賊接仗
弁兵鄉勇內受傷者十數名各弁兵鄉勇晝夜
奔馳奮力追剿甚屬艱辛

臣

已查明擒殺賊目

賊匪出力之人分別賞給銀鏢銀牌以示鼓勵

查李彬股匪經此次痛剿之後人數已殲擒過
半緊要賊目多被斬獲惟首逆李彬尙未就縛
殊深憤恨現在該匪所存不過千數人向松林
菴火阡河遁入東鄉太平界內臣督同楊遇春
已由方山坪追抵城隍廟惟有鼓勵官兵勉力
趕剿以期剋日掃蕩現據總兵田朝貴報到十
四日在黃栢河打仗遊擊賽尙阿都司七十三

孫斯禮守備張雲鳳陣亡弁兵鄉勇死傷共數

十人

臣

前於恩陽河見該鎮人尙勇幹所帶兵

勇亦皆強健此次因未探明後起賊隊以致首

尾未能兼顧雖畧有挫折尙屬可用現在勒保

又添派貴州官兵三百餘名與之歸併統計兵

勇已及二千名不爲單弱

臣

現飭該鎮將兵勇

妥爲整頓並飭川北道李鎡添補鍋帳仍令田

朝貴速卽帶赴廣元一帶剿辦魏逆等股零星
餘匪再查慶成前在寧羗之乾溝河截剿賊匪
兵勇於霧雨中被賊衝突維時有遊擊和什布
未經回營因無實在下落是以未卽具報茲據
慶成呈稱現已派人將和什布屍身尋獲實係
於打仗時被賊矛連戳數傷跌入崖下殞命相
應據實奏